

Date – 26/06/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoman Constitution Danpuiin Mizote a humhim tlat avang leh democracy lungphum – zalenna – Mizoten an neih avangin India ramah Mizote an him a ti.
2. Ministry of DoNER hnuaia High Level Task Force on North East Economic Corridor chu an convener Chief Minister Pu Lalduhoma hovin nimin khan online meeting an nei.
3. Operation Sindhu hnuaiah Iran-a Mashhad atangin mi 296 dam taka India ram hruai thlen an ni.
4. Union Defence Minister Rajnath Singh chu SCO Defence Minister meet-a tel turin China-ah a thang mek.

<><><>

CM : SAMVIDHAAN HATYA DIWAS

Chief Minister Pu Lalduhoman Constitution Danpuiin Mizote a humhim tlat avang leh democracy lungphum – zalenna – Mizoten an neih avangin India ramah Mizote an him a ti.

Nimina Aizawla Art & Culture Department buatsaih Samvidhaan Hatya Diwas puala hun hmanah thusawiin Chief Minister Pu Lalduhoma chuan Mizote himna leh him lohna chu danpuiah a innghah thu sawiin dan chu palzut a nih chuan engkim a lo derthawng nghal mai dawn a ti.

India ram danpui, Constitution chu kum 1975-ah thah anih thu leh hemi hriatreng nan leh a thlen tawh lohna turin Samvidhaan Hatya Diwas chu hman a ni a ti a, hei hi Politics-a inbeihna hmanruate pawh a ang thei naa, Democracy tun din leh ram Danpui humhalh a tulzia hriat thar na a ni tih hriat a ngai a, India danpui hnuaiah Mizo hnam leh sakhuate humhimna fel tak a awm tih sawiin Article 371G ah Mizote tan inhumhimna fel taka dah a nih thu leh Bengal Eastern Frontier Regulation Act 1873 hmangin Inner Line Regulation leh non tribal ten Mizoramah ram an neih ve theih lohna a awm thu a sawi a ni.

Art & Culture Minister Pu C. Lalsawivunga pawhin thu sawiin India danpui venhim kawngah hma lak a ngaih thu a sawi a, India danpui chu dan thuziak satliah a nih loh thu leh India rama dan lal ber, mipuite kaihruaitu a nih thu a sawi a. India danpui ngaipawimawha a thil tum te tihlawhtling turin kalkhawm te a sawm a ni.

Samvidhan Hatya Diwas puala hun hmanah hian zirlaite an kal khawm a. He ni puala thil pawimawh hrang hrang phochhuah a ni bawk a ni.

Samvidhan Hatya Diwas pual hian Aizawla BJP pisa ah hun hman a ni a, heta thusawitu BJP Mizoram State President Pu Vanlalthmuaka’n kum 1975 a Congress sorkar, Pi Indira Gandhi in emergency a puan chu thangthar lo awm zel tur ten an theihnghilh ngai tawh dawn lo a ti a. Khatiang thil kha khawvel democracy ram lian leh ropui berah a thlen tawh lohna turin inzirtira inhrilhchhawn zel a ngai a ni a ti a.

Pu Vanlalthmuaka chuan Emergency puan a nih lai khan khatih laia Prime Minister Pi Indira Gandhi khan amah chu Constitution-a a inngaih tawh thu leh thuneihna vawrtawp amah a inpek thu a sawi a. Article 352 leh 356 tlawhchhanin politics-a amah tan lo tu chu nasa takin a bei a ti a, Mizoramah pawh Maintenance of Internal Security Act hmangin Brig. T, Sailo, Pu R. Vanlawma, Pu C. Vulluaia, Pi Sanglianchhungi te bakah mi tam tak man an nih thu sawiin tute emaw sawisel ngawr ngawr an ni lo a ti a, khatiang thil duhawm lo thleng kha a thlen tawh lohna turin thangthar zel te zirtir a pawimawh avangin he ni puala hun hman anih thu a sawi.

Kum 1975 June ni 25-a ram puma emergency puan hriat rengna ni, Samvidhaan Hatya Diwas chu nimin khan ram pumah urhsun taka hman a ni a, emergency puan vanga harsatna nasa tak tuartute hnena zahna hlanna ni-ah hman a ni bawk.

Prime Minister Narendra Modi-a chuan khawng taka Emergency do dal tlattute, he ni pual hian zahna chibai a hlan a, vawiin hi India democracy chanchina hun thim lai ber a thlen atanga kum 50-na anih thu social media-ah tarlangin he ni-ah hian India ram Danpui chu hnawl a ni, a ti a, fundamental right-te khuahkhirh a nih bakah chanchinbu mite zalenna pawh hmeh mih a ni, a ti a, political party hruaitu hrang hrang bakah khawtlang taka thawktute, zirlaite leh khua leh tui engemawzat jail-ah tan tir an ni, a ti bawk.

<><><>

CM SPECIAL PACKAGE

ZPM sorkar flagship prog hnuaia Chief Minister special package-ah a thawhkhatnaah mi 2226 dawng tura thlan an ni.

Nimina Chief Minister Pu Lalduhoma hoa Mizoram State Policy Coordination Committee thutkhawmah special package dawng tur te hi tarlan a ni a. Chief Minister special package ah hian a thawhkhatnaah mi 2000 target siam a nih thu tarlan a ni a. Hetihlai hian a diltute zingah cheng nuai khat tling lo dil engemaw zat an awm avangin mi 2,226 te chu dawng tura thlan an nih thu tarlan a ni a. Dilna thenkhat chu an hmalakna tura an sum mamawh zat aia tam dil an la awm nia a lan avangin a dawngtu tur zat hi a la danglam thei dawn tih tarlan a ni bawk.

CM special package dawng tura thlante hi a rang lama training pek tur an nih thu tarlan a ni a. Training an kal zawh veleh sum hi pek an ni dawn tih tarlan a ni a. Tun July thla chhung hian line department ten dilna an la kawl te a tam thei ang ber lo endik se, August thla atang chuan dilna hi hawn leh tan ni se atiin rel a ni bawk.

<><><>

DONER MEETING

Ministry of DoNER-in India hmarchhak hmasawwna tura Economic Corridor hmathlir duang tura a din High Level Task Force on North East Economic Corridor te chu an convener Pu Lalduhoma, Chief Minister hovin nimin khan online meeting an nei.

Chairman Pu Lalduhoma chuan meeting-a tel te chungah lawmthu sawiin, a ngaih pawimawh thil te a sawi hmasa a. Hmarchhak infrastructure tihchangtlun tulzia tarlangin; Mizoram Road density hi India ram average aiin a hniam zawk hle a, infrastructure dangah pawh kan la hnufum hle. Infrastructure te tihchangtlun anih hian chhak lama Asian ram te nena an inkalpawhna an titha a ni nghal zel a, thawh tur a tam hle a ni, a ti. Hmarchhak bialte tana hmathlir fel tak neia hmalakpuitu Pu Jyotiraditya Scindia, DoNER Minister chungah lawmthu a sawi bawk.

He hunah hian DoNER Minister Pu Jyotiraditya Scindia, Meghalaya Chief Minister Pu Conrad Sangma, Assam Minister Pu Chandra Mohan Patowary, Manipur Chief Secy Pu PK Singh, leh official dang ten thu an sawi a, an sawihona te hi state tin ten an thlirho leh ang a, meeting an la nei zui leh ang.

He Task Force hi Ministry of DoNER-in India hmar chhak hmasawwna ruhrel pawimawh thawh tur, short term, medium term leh long term ruahmanna neia rawtna siam tura din a ni.

<><><>

MPCC

Mizoram Pradesh Congress Committee (MPCC) Treasurer Dr Lalmalsawma Nghaka chuan Mizoram Universal Health Care Scheme (MUHCS) chu zawm tura private hospital te nawrh luihin an awm ni a lang mek chu thil nihphung tur a ni lo a ti.

Nimina Aizawl Press Club-a chanchinbumite a kawmnaah he thu hi sawiin MPCC Treasurer chuan MUHCS chungchanga Private Hospital neitute thuchhuah leh TV vela an kawmna atanga sawrkar in a duh ang barhluih tuma hma a la ni awma lang chu an ngaih thutak thu a sawi a. Private hospital te nen sawihoa inrem tur a nih laia sorkarin a duh anga engkim a kalpui hnuah zawm tura a ti chu Private hospital te tan pawm theih chi niin a langlo a ti.

MPCC Treasurer chuan MUHCS-a tun thlenga mi 5000 vel chauh an la inziaklut chuan mipui rinhlelhna a la len zia a ti lang a ti a, Sorkar damdawiin lian ZMC leh Civil Hospital-ah khum chan a har avangin emergency tak taka inzai ngai te, nau vei ten Private Hospital an pan loh theih loh hun a awm

avangin harsatna a thleng chho mek a ni a ti a, heng thil lo thlen chhan chu sawrkar ruahmanna fel loh vang leh kalphung hriat loh vang a ni a ti.

Hei hi kalphung thar anih chuan mipui in an tuar nasa dawn a, an hriselna phei chuan a tuar hle dawn a ni a ti a. Scheme mumal lo taka kalpui a tum chu ZPM sawrkar chuan ngaihtuah tha leh se, Private Hospital te nen inremna neihpui thuai se, hlawhtling takin kal se tih chu an party duhdan a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

IRAN

Tun hnaia Israel leh Iran boruak avanga Sorkar laipuiin India khua leh tui heng ram pahnih a awmte hruai haw runpui a neih, Operation Sindhu ti a a kalpui mekah nimin khan Iran-a Mashhad atangin mi 296 dam taka India ram hruai thlen an ni.

Ministry of External Affairs thuchhuakin a tarlan danin an ni rual hian Nepal khua leh tui mi pali te pawh Indian Air Force thlawhtheihna hmanga New Delhi rawn thlenpui an ni a, Union Minister of State for Labour, Employment and MSME Shobha Karandaje chuan thlawhna tum hmunah heng mite hi lo hmuakin India mi 18 pawh Israel atangin an lo haw tawh bawk a, ti hian hriat theih chinah Operation Sindhu hnuaiah hian India khua leh tui mi 3154 te chu him dam taka India ram thlenpui an ni tawh a ni.

<><><>

DEFENCE MINISTER TO ATTEND SCO MEETING :

Union Defence Minister Rajnath Singh chu SCO Defence Minister meet-a tel turin China-ah a thang mek.

Vawiina Qingdao khawpui a Sanghai Cooperation Organisation a tel ram Defence Minister theuhte thukawm tur hian thil pawimawh tam tak an rel tura ngaih a ni a, heng zingah hian remna leh muanna kenkawh bakah a rawl ral a chetna thleng thin chungchanga SCO a tel ramten thawh hona tha zawk an neih theih dan tur pawh an rel rin a ni.

Union Defence Minister hian SCO meeting-a a tel bakah he huna tel Russia leh China palaite a kawm bawk ang. Sanghai Co-operation Organisation hi kum 2001 khan din a ni a, SCO ah hian ram 10 Kazakhtan, China, Kyrgyzstan, Pakistan, Russia, Tajakistan, Uzbekistan, Iran, Brelarus leh India te telin India ram hian kum 2017 khan member hun pum a nihna a nei a ni.